

5. November 2015

**Ilinniartut Kalaallit Nunaata avataani ilinniartut naammassereernermik kingorna ukiut qulit angullugit Kalaallit Nunaannut uteqqittanginnerat kiisalu ilinniartut naammassereerlutik Kalaallit Nunaannut uteqqikkumasanginnerannut pissutaasut pillugit misissuinissamut aallartitseqqullugit Naalakkersuisut peqquneqarnissaannik Inatsisartut aalajangiiffigisassaattut siunnersuut. Misissuinerup kinguneranik uterartitsinissaq pillugu iliuusissamik pilersarusiortoqassaaq, kalaallit ilinniartut naammassereerlutik Kalaallit Nunaannut uteqqittarnissaminut kajumissuseqalernissaannut kaammattuutaasussamik.**

(Inatsisartunut ilaasortaq Randi Vestergaard Evaldsen, Demokraatit)

Ilinniarsimassutsip kiisalu ilikkarsimassutsip tamatigut qaffassartuarneqarnissaa tamatta soqutigisaraarput pingaartitaralugulu. Taamaammat Inatsisartuni Ilaasortat Demokraatineersut nunarput qimallugu ilinniagaqarlutik nunatsinniik ilinniarnertik peqqutigalugu nunanut allanut nuukkallartartut naammassigaangamik tamarmik nunatsinnut utertanginnerannut pequtaasunik misissueqqusillutik Naalakkersuisunut peqqusinerat pillugu Siumumiit ima oqaa-seqassaagut.

Nunarput qimallugu qaffasissumik ilinniagaqalersartut amerliartorput tamannalu nuannaarutissaavoq. Inuusuttuunermi pissutsinik sungiusimasanit allaanerusumik takunninneq inuiaqatigiillu aqqissugaanerannik kultooriannillu allarluinnartumik avatangiiseqalerneq inummut ineriartuutaasarput annertuut ilinniagaqalersimanerullu saniatigut sakkussanik pitsaasunik tunngavissiisarlutik.

Nalunngilarput ilinniagaqarlutik nunarput qimallugu aallarsimasut ajoraluartumik suli amerlavallaartut nunatsinnut ilinniakkamik naammassinnereernerup kingorna utertangitsut, sunillu patsiseqarsinnaaneri ersarissumik suli misissuiffigineqarsimanatik. Taamaammat nuannaarutissaavoq Naalakkersuisut siunnersuut ilalerlugu tigulluarmassuk.

Naalakkersuisut akissuteqaatiminni ilinniagaqartut uteqqittanginnerannut siuliani misissuisimaneq eqqaavaat, tassanilu tunngavilersuutinut ilaasoq tassaavoq ilinniagaqarnermi nunatsinni suliffeqarfinnut attaveqartariaqarnerup pingaaruteqassusaa. Tassungalu atatillugu eqqaanngitsoorumanngilara nalunnginnakku Kommune Kujallermi Qallunaat Nunaanni ilinniagaqartut peqatigiiffiat Kalaallillu illui peqatigalugit aqqissuussaqaartut pitsaalluinnartumik.

Aqqissuussinerup siunertaraa, ilinniagaqartut atuangiffeqarnerminni ilinniakkaminut naapertuuttumik atorfirmik neqeroorfigineqartarnerat. Imaanngitsoq atuangiffeqarnerup nalani pisiniarfinni allanilu ilinniagaanut naapertuutinngitsumi suliffeqartut. Taamak aqqissuussisimaneq nuannarineqarpoq ilinniartunillu tigulluarneqarluni. Taamaliernerullu nunatsinnut nunatsinnilu suliffeqarfinnut attaveqarnek qularnaarpaa, tassuunakkullu qularnanngitsumik ilinniakkamik naammassinninnerup kingorna uternissaq kajumernarnerusutut issasoq qularutissaanngilaq.

Ilinniartut ilinniakkaminnik naammassinninnerup kingorna utertartorpassuit qujarullugit, amerlanerusulli angerlartarnissaat ukkallugu misissueqqusineq tigulluarparput, nunaminnullu uterlutik sulilertarnissaat tikilluaqqungaarpaput.

Kingulliullugu naggasiutitut oqaatigiumavarput, nunaqqativut ilinniarluarsimasut atorfinnik qaffasissunik ilinniagaannut naapertuuttunik tatigalugit atorluarneqartariaqarneri immini aamma saqqumilaartinneqartuartariaqartoq.

Taamak oqaaseqarluta siunnersuut ilinniartitaanermut kultooreqarnermut ilisimatusarnermut ilageeqarnermullu ataatsimiitsitaliamut ingerlateqqinneqarnissaa innersuupparput.

Vivian Motzfeldt  
Siumut